

400 onns suenter

Nov guid davart la Refurmaziun en Vuclina

DA AUGUSTIN BEELI/FMR

■ **Avant 400 onns era il Grischun in grond plazzal da conspiraziuns politicas e conflicts confessiunals. Las terras subditas Vuclina, Buorm e Clavena pativan spezialmain. Latier è questa sonda ina dieta a Tirano.** Ils 18 da fanadur 1620 è succedì en Vulina in assassinadi collectiv ch'è in l'istorgia cun il num «Sacro Maccello». Ils subdits valtelines han fatg ina revoluziun sanguinusa cunter ils signurs grischuns e mazza pli che 600 persunas innocentas. Ins ha empruvà da stizzar il feu protestant en la Vuclina, Buorm e Clavena. Els chastellans da las Trais Lias sa cumporavan sco signurs prepotents ch'ils indigens odiavan pli e pli. Il domini grischun sa manifestava tras las emprovas cuntinuadas d'introducir la confessiun evangelic-refurmada.

«Ils grevs acts sanguinus èn il punct culminant dramatic d'ina chadaina da conflicts gia existents tranter subdits e signurs, tranter catolics e protestants», san

ins leger en l'invit a la dieta da questa sonda a Tirano. Influenza decisiva tar questa chadaina da conflicts han già er ils interess strategics e geopolitics internaziunals.

Collavuraziun Sondrio e Grischun

400 onns suenter l'uschè numnà «Sacro Maccello» s'inscuntran istoriografs e scenziads per discutir da quest temp stgir, ed emprovan da valitar da nov la situaziun. Suenter l'assassinadi collectiv era la situaziun explodida. Conspiraturs indigens, pajads e dirigids da pussanzas estras sco la Spagna, han vuli extirpar il scherm evangelic-refurmà. Tant la populaziun valtelinesa sco quella dal Grischun han patì grev las consequenzas da la violenza.

Dacurt è cumpari in guid en linguatgalian e tudestg che tracta quest'istorgia ed ils lieus principals. La versiun tudestga ha il titel «Geschichte und Orte der Reformation. Ein Führer». I sa tracta d'in cudesch da 185 paginas che quater auturs dal Grischun e da la Vuclina han edì comunablamain. L'idea d'in cumpendi è naschida d'ina collavuraziun da

diesch istoriografs dal chantun Grischun e da la provinzia da Sondrio.

La carta geografica da las Trais Lias, stampada sin pagina 172, gida a s'orientar. La squadra dals editurs èn *Jan-Andrea Bernhard, Augusta Corbellini, Daniele*



La fotografia dal frontispizi mussa las duas baselgias da l'aclaun Selva in la Valposchiavo.

Papacella e Guglielmo Scaramellini. La publicaziun è in cumpendi per emprendre a conuscher la situaziun politic-confessiunala d'avant 400 onns. Jan-Andrea Bernhard dat ina survista istorica dals fatgs, da la regiun e dal svilup da la Refurmaziun en l'Europa, en spezial a Cui-ra e d'omaduas varts da las Alps. Gronda influenza en il sid ha già l'antierur uvestg da Capodistria, Pier Paolo Vergerio. Quel era fugì da l'Italia ed ha cumenzà a missiunar cun success en la Bregaglia. Sia finamira era da promover l'evangeli per la populaziun e betg sulet per la classa dals clericals. In tschert fanatissem d'omaduas varts ha manà a gronds conflicts. «Papists» e «predicatur» radicals vesevan mo lur ideologia umanistica, e nagut auter avess già plaz. Da questa situaziun en Vuclina e Grischun han las pussanzas estras, Venezia, Spagna, Austria e Frantscha, pudì profitar sapientivamain. La dominanza era la finala pli centrala che la cardientscha.

Il cudesch, produci en furma concisa ed adattà a la pratica d'in guid da viadi, è

in agid. Or da la vista lontana vul el promover la chapientscha vicendaivla per il temp stgir e malsegir. Otg chapitels èn deditgads ad ina survista da mintgamai ina regiun, Bregaglia, Valchiavenna, Morbegno e part sut la la Vuclina, Sondrio/Val Malenco, Toglio/Tirano, Poschiavo, Bivio e Mesauc. Ils auturs dals singuls chapitels resumeschan a moda captivanta e lev chapaivel la situaziun istorica. Els visitan ils lieus, emprovan da reconstruir ils fatgs ed analiseschan las ideas dals protagonistas da quest temp. Il guid è da cussegljar a tgi che s'interesscha per l'istorgia grischuna dal 16 e 17avel tschentaner.

Alla dieta da sonda proxima a Tirano sa participescha per il Grischun *Flo-rian Hitz*, il president dalla Societad istorica dal Grischun e collavuratur da l'Institut per la perscrutaziun da la cultura dal Grischun.

Il guid «Geschichte und Orte der Reformation. Ein Führer» san ins retrair en las librerias.